

按漢書西域傳云：『元貴靡子星靡代爲大昆彌，弱，都護韓宣奏烏孫大吏大祿大監，皆可以賜金印紫綬，以尊輔大昆彌，漢許之。』徐松補注云：『韓宣代鄭吉，當在元帝初。』按甘露中鄭吉尙爲都護，當更盡於宣帝之末，則韓宣爲都護當在元帝初元元年，徐松之言是也。以三年更盡之例推之，當終更於初元三年也。又按自初元四年至建昭二年共九年，應有三都護，人名不詳。

三、甘延壽 起於建昭三年，訖於建昭五年。（公元前三六—三四）

按漢書西域傳大月氏國條云：『都護甘延壽，副校尉陳湯，發戊己校尉西域諸國兵，至康居，誅滅郅支單于，是歲元帝建昭三年也。』又陳湯傳：『建昭三年，湯與延壽出西域。』是甘延壽爲都護在建昭三年，終更於建昭五年也。

四、段會宗

第一任起於竟寧元年，訖於成帝建始二年。（公元前三三—三二）
第二任起於陽朔四年，訖於鴻嘉二年。（公元前二—一九）

按漢書段會宗傳云：『竟寧中，以杜陵令五府舉爲西域都護騎都尉光祿大夫，西域敬其威信。三歲，更盡還。』徐松補注曰：『竟寧元年封騎都尉甘延壽爲列侯，蓋延壽更還，會宗代之。』據此是會宗起於竟寧元年，終更於成帝建始二年也。

又會宗傳：『陽朔中，會宗復爲都護。』按韓立爲都護在陽朔元年，三年更盡，則段會宗復任都護，應在陽朔四年，終更於鴻嘉二年也。

五、廉褒 起於成帝建始三年，訖於河平元年。（公元前三〇—二八）

按漢書西域傳烏孫條云：『韓宣奏星靡怯弱可免，更以季父左大將（百衲本漢書大作代，據上文改。大古音讀代，音近而譌。）樂大爲昆彌，漢不許。後段會宗爲都護，招還亡畔，安定之。』又云：『安日使貴人姑莫匿等三人詐亡從日貳，刺殺之。都護廉褒賜姑莫匿等金人二十斤，繒三百匹。』按段會宗爲都護在竟寧元年，更盡於建昭二年。傳叙廉褒賜姑莫匿等事於段會宗之後，則繼段會宗爲都護者當爲廉褒，故廉褒爲都護當在建始三年。